



Fasnacht 1975

Junteressli

Es pryselet, es kryselet, es goht e dyre Wind

's ruscht so lycht im Money-Wald
mänggem wärde d'Fiessli kalt
d'Staatskasse goht uff d'Aier
und bloost dr Marsch vom Pleitegeier!
Au d'Aidgenossenschaft isch «lugg»
– d'Devyysli gehn scho ganz nätt z'rugg!
's goldyg Kälbli duet rächt fuul
und scho deent's us jedem Muul:
– vo dr Braity bis uff Rieche –
«die Eelprinz sin doch frächi Sieche»!
so findet au dr dimmschti Stogg
gligligg no ne Sindebogg!
Derby isch alles klar wie Gille:
e Paar hän kenne fille
ihr Bortmonnee und Bankkonto
uff aimool isch dr «Blägg-Aut» do:
Grieggsch vor Schrägg fascht graui Hohr
– wär mungglet do vo «Dryssger» Johr?? –
d'Zahltags-Gugge isch zwor grooss
doch d'Bryys' – die glättere famos!

es pryselet, es kryselet, es goht e dyre Wind
Mit de Läppli kasch bald jasse
doch als wie schlächter bisch by Kasse . . .
und 's Index-Männli, das lauft gschwind!

Dyrer wird au als wie meh
's Yscorné im Eglisee
Derfir kasch ächti Panama-Rinde
uffem Märt no ginschtig finde
doch Pfyffedeggel, Gopfrid Stutz
e Batzelaibli koscht' e Stutz!
Fir e Zaine Bäaredräng
zahlsch numme noh e halbe Schnägg!
Brot und Milch und Alpe-n-Angge
bringe 's Büdsché bees ins schwangge!
Fir Y-bi-Dumm und Hau-my-Blau
sin d'Bryys zer Zyt scho ehnter flau
wotsch e Zwaier Joli suffice
koscht' Di das scho ganz e Huffe.
Ginschtig sin, y finds dr Clou
in Wescht-Europa d'Cara-Mou!
Doch mechtsch e Lääberli minute ässe
isch dr Bryys scho ganz vermässe
drum schputte mir jetz scheen ellai
e ganzi Pfanne Vogel-Hai!

es pryselet, es kryselet, es goht e dyre Wind
liggsch im Spittel by de Grangge
koschtet jede Furz e Frangge
und 's Grangg-sy isch hit fascht e Sind!

Doch allewyl funggt e Hoffnigs-Fungge:
dr Siessholz-Bryys isch wirgglig g'sungge!
Und statt dyrem Fläsche-Wyy – bigoscht
suffe mir jetz alte Moscht.
Z'Obe gehn mr frieh ins Bett
uff d'Arbet mitem Trottinett
Hesch vyl Kummer, ganzi Päggli
probiersch's mit Latärne-Träger-Bäggli
statt z'Bangkogg go flaniere
gohsch in d'Lange go spaziere
Hesch zem Fyre kaini Kohle
kasch immerhin dr -minu hoole
und ka Di wirgglig gar nyt rette
machs en Autobahn-Staffette
Uff jede Fall hett's ganz kai Spitz
wenn'd verliersch dr Basler Witz
– au ebbis luschtigs isch e Gloon –
gang doch emool ins Stadioon!
Mir als armi Junteresser
sehn alles doch e bitzli besser:

es pryselet, es kryselet, es goht e dyre Wind
Due di numme gaischtyg bsinne
und nit wägem Mammon afoh spinne
's Gäld isch nämlig sowieso kai guete Frind!

Prysele und krysele duets in dr
Latärne-Uusstellig ganz nit!
Si isch offe, vo de morgen am Nyni bis zooben
am Elfi, wie allewyl in dr Muschtermäss.
